

李文恭公遺集

李文恭公奏議卷二十二目錄

湘陰李星沅石梧著

男

榛 概 桓 梳

編次

使粵

會奏添派鎮將堵勦武宣東鄉逆匪情形摺子

會奏派委道員督勦賀縣賊匪摺子

會奏官軍勦捕太平府屬股匪護協及文員等傷

亡摺子

附奏覆陳

諭飭籌辦事宜片子

附奏各土司州縣緝捕匪徒片子

附奏勦捕鬱林博白兩屬股匪片子

會奏官兵二次進勦武宣逆匪未能得手請

旨嚴議摺子

遵查知縣自盡實情並將營員嚴辦摺子

會奏請

旨迅賜簡放總統將軍督同勦辦片子

會奏添調川楚鎮將官兵片子

會奏官軍進勦賀縣里松失利情形摺子

會奏續調黔兵摺子

會奏調派鎮將勦捕鬱博匪徒片子

會奏預防凌洪兩股逆匪竄合片子

會奏東蘭宣化等州縣拏獲匪徒片子

會奏籌畫軍餉片子

會奏暫畱黔餉接濟軍需摺子

會奏據實查參已革廣西巡撫鄭祖琛摺子

奏報親往武宣督勦摺子

會奏查參鎮道知府各員摺子

附奏會籌勦辦不敢稍存觀望片子

會奏覆陳

飭發奏單事宜並查復張敬修等分別飭調詳查片子

會奏勦捕賀縣鬱林陸川各股匪徒情形片子

奏報馳抵武宣察看情形摺子

奏報滇兵進勦鬱林州會匪連獲勝仗摺子

會奏西林縣城失守並查參失守各員及調派鎮

將督勦摺子

會奏進勦大勝堂股匪連獲勝仗摺子

會奏懷集陸川博白等縣勦捕匪徒片子

會奏查覆鶴年王淑元邵坦各員身死實情片子

附奏舊疾復發醫治未愈片子

會奏鬱林州解圍情形摺子

奏明舊疾增劇謹將

欽差大臣關防面交撫臣監護摺子

遺摺

會奏添派鎮將堵剿武宣東鄉逆匪情形摺子

奏爲武宣東鄉逆匪經臣周天爵臣向榮親督官兵

進剿各有殲擒弁兵亦有傷亡現派鎮將分投堵

截偏近兜剿恭摺由驛奏祈

聖鑒事竊查金田大股逆匪前經官兵於二月初三初

五初八等日在大黃江等處疊次攻剿竄入武宣

東鄉一帶臣等仍卽督兵進剿均經會摺

奏報在案茲臣李星沅接准臣周天爵臣向榮會銜

咨報二月十五日探報賊匪多人在武宣縣東二十餘里之附近村莊焚燒房屋有欲窺伺縣城之意當卽親率官兵前往剿捕竝經臣周天爵親率壯勇從後接應該匪知有官兵前來卽行遁回東鄉因恐賊以一股綴我以一股由大樟而竄刻卽派令署參將成安管帶撫提標及桂林官兵七百餘名楚全勇四百名竝令已革守備楊熹管帶獍勇五百名漏夜趕往象州臣李星沅復由柳州添

派提標官兵四百名竝飭署貴州古州鎮李瑞管帶黔兵八百名馳往分段扼要堵截以固省垣東南門戶竝札飭修仁平樂一律嚴防十七日巳刻據探差回報東嶺村有逆匪數千人在彼滋擾當派投効已革千總馬文華管帶提勇三百名竝副將和春都司鄧紹良鄭魁士管帶楚兵數百名先行臣向榮親率官兵馳往督戰竝經臣周天爵親率兵壯二百名帶同候補知府張敬修管領東勇

二百名前往接應兵壯行至台村賊衆尙在東嶺
村內當令提勇進村誘敵該匪各執五色大旗扛
擡鎗礮分三股前來抗拒臣向榮親率官兵由中
途截殺提勇由左邊接殺閩勇由右邊冲殺賊亦
開放大礮回拒自午至未鎗斃賊匪數十人賊立
不退都司鄭魁士身先士卒被一賊執長矛刺來
該都司閃開僅戳穿左脇衣衫該都司乘勢將長
針奪過經四川壯丁陳剛搶上將賊砍倒割取首

級都司鄧紹良追殺賊匪被長矛劃傷右額角賊
匪因見左右勇壯立腳不住分股由兩邊抄來中
路賊匪亦拚命來撲臣向榮見勢危急催督兵壯
奮勇抵住竝親燃烏鎗連斃賊匪二人惟管帶閩
勇之從九吳貽書被戕殞命閩勇敗走臣周天爵
手及二人迄不能止遂親督候補知府張敬修率
帶東勇搶上又自未至申殲斃賊匪數十人投効
已革外委李元吉力戰身死提標外委范繼昌右

手亦被矛傷該匪戰久難支始行怯退兵壯追殺
沿途斬獲首級數顆奪獲器械多件時已日暮撤
兵回營查點兵壯僅傷斃數名受傷數名飭醫調
治等情咨請會銜具

奏前來

臣

李星沅查此次官兵攻剿雖未能大挫賊

鋒而力戰數時之久先後均各殲斃賊匪數十人
兵勇傷亡無多該匪戰久難支卽行怯退是軍威
亦不致過蹙惟查逆匪自燒牛排嶺盡誅嬰兒以

絕繫戀直走武宣東鄉該處北連象州修仁平樂
竝桂林省城其居心叵測已據犯供吐出亟應厚
集兵力逐層圍攻竝將貴州鎮遠鎮秦定三所帶
黔兵二千二百名調至武宣會同楚兵及各路兵
勇相機進剿仍飭雲南臨元鎮李能臣等分帶滇
兵二千名圍截紫荊山歸路一俟天色晴霽尅期
竝力夾攻以申撻伐至候補從九吳貽書已革四
川川北鎮標藍翎外委李元吉奮勇捐軀懇

恩勅部議卹所有武宣東鄉逆匪經臣周天爵臣向榮

親督官兵進剿緣由謹會同兩廣總督臣徐廣縉

合詞恭摺馳

奏伏乞

皇上聖鑒訓示謹

奏 咸豐元年三月初二日具

奏奉

硃批另有旨欽此

會奏派委道員督剿賀縣賊匪摺子

奏爲賀縣地方另股賊匪滋擾現經添派官兵壯勇
並道員馳往會同東省文武合力剿辦恭摺由驛
奏祈

聖鑒事竊查懷集賀縣一帶毗連廣東開建廣甯等處
時有游匪往來疊經臣等嚴飭各該縣厚集官兵
壯勇扼要嚴防茲二月初間該匪復糾千餘人竄
至懷集詩洞轉竄賀縣舖門墟該署縣甯域護都

司郭維彪傳集團練其有五六千人該護都司於
初三日管帶兵壯由中路練勇分列左右一同進
剿該匪先撲中右兩路兵練尙不爲動突有籐牌
十餘賊向左衝撲該練勇當卽逃散右隊練勇亦
走兵壯撤退對河該匪在舖門殺斃團練黎鏞之
子竝焚燒房屋由官潭洞尾等處直撲近城之河
東臣等接據稟報飛調在潯協剿之廣東督標參
將丁振剛統帶官兵五百名馳往追擊竝經藩司

勞崇光在梧州僱勇四百五十名該道府先僱閩
勇八百名陸續前往知會該縣營督率兵壯會合
截剿二十日都司周慶龍分領兵壯四百名馳至
芳林尙未紮營賊分三路來撲該都司督令攻擊
殺賊十餘名旋因衆寡不敵兵勇傷亡數十人礮
械亦有遺失賊匪卽竄黃田里松一帶仍在賀縣
境內與懷集昭平竝湖南江華等縣接壤路徑紛
歧恐致竄越業經該道林士傳馳赴榕津墟扼要

駐紮剿辦竝准督

臣

來咨業已飭委廣東督標參

將左圻肇慶府知府蔡振武等各帶兵勇至賀縣

迅速會剿

臣

等復經函商由武宣添派候補知府

陳瑞芝帶壯勇五百名馳往接應竝飛咨湖南提

督飭派防兵於江華等縣截拏查此股賊匪忽聚

忽散來去無常甫經竄入懷集詩洞

臣

等卽將該

縣李萱批飭撤任復飭賀縣等處上緊嚴密防堵

該署縣甯域等竝不實力堵禦以致賊匪竄逼近

城沿途脅掠該縣團練五六千人先在鋪門墟被賊一撲卽散至芳林接仗兵勇復有傷亡並失軍械賊勢甚屬猖獗該署賀縣知縣甯域護富賀營都司郭維彪身任地方堵禦無能庸懦已極平樂協中軍都司周慶龍派令帶兵進剿乃復傷兵失械又因兵勇三人被賊勒贖函致該道實屬冒昧糊塗相應請

旨一併先行革職甯域郭維彪並拔去花翎均仍責令

隨同文武相機迅速堵剿如不奮勉自効戴罪立功再行嚴參治罪以儆玩泄所有賀縣另股游匪竄擾現經調派官兵壯勇並道員馳往會同東省文武合力剿辦緣由謹會同兩廣總督臣徐廣縉恭摺由驛馳

奏伏乞

皇上聖鑒訓示謹

奏 咸豐元年三月初二日具

奏奉

硃批另有旨欽此

會奏官軍剿捕太平府屬股匪護協及文員等傷亡摺子

奏爲太平各屬另有股匪竄擾飭派鎮將督剿先後
斬擒數百名被匪撲擁沙灘該護協及文員等受
傷墮河溺斃現仍嚴飭實力堵剿恭摺由驛奏祈
聖鑒事竊查太平龍州等屬前有賊匪分股竄擾當經

臣等飭派左江鎮德亮並護新太協謝陞恩署太
平府吳德徵等各帶兵壯勦捕二月初四日追至
崇善縣屬水口村適遇賊匪搶奪竹筏船隻過河

該鎮卽飭弁兵上前攻擊殺傷賊匪十餘名轟斃
四五十名落河淹斃多名並將竹筏船隻擊散鑿
沉馱盧司巡檢賈中孚帶勇生擒賊匪楊亞慶一
名外委蔣得龍李崢發等奪獲子母礮二桿籐牌
六百大小鐵彈一篋長針挑刀各數十件查點兵
壯受傷數名又上龍土司武德隘賊匪經該府協
督帶官兵練勇往捕二月初五日直攻賊巢拋擲
火罐焚燒房屋賊匪突出抗拒兵勇分路夾擊殺

斃賊匪數十人生擒楊老六等五名署千總曾朝
玉深入搜捕格殺賊匪二名被匪用長矛戳傷竝
中伏礮殞命該護協謝陞恩督兵援應復殺賊匪
多名竝生擒放礮之農昌秀等二名奪獲賊馬七
匹器械籐牌噴筒等件賊卽分股由山左繞出適
龍憑營把總袁國璘帶兵堵禦殺賊數人袁國璘
亦被拒傷斃命兵勇亦有傷亡該府協稟請左江
鎮德亮就近督兵馳赴龍州堵捕詎該鎮未到之

先賊匪於初十日由上龍直撲龍州官兵壯勇施
放大礮轟擊斃賊多人賊匪卽分夥四面包抄兵
勇仍分隊迎擊而賊夥人衆勢難抵禦且戰且退
屯紮河灘賊匪復擁至衝突護新太協謝陞恩憤
激直前殺賊數人被賊礮中傷右胯落河殞命署
龍州廳蘇勒芳阿被匪用器械撞倒署州同李懋
萃被賊礮中傷均致溺斃並失去土江州州同關
防一顆蘇勒芳阿之子熙恒隨身救護亦被撞跌

落河兵壯均有受傷淹斃該署府吳德徵親行督戰亦被賊擁跌落馬擦傷手臂卽經壯勇救回行抵大岸地方適左江鎮德亮帶兵趕至該署府卽與會商星馳前進十三日黎明抵龍州查探賊匪尙在該處屯聚該鎮卽督飭兵勇開放鎗礮併力合攻竝令四圍放火賊匪抵死拒敵自卯刻開仗交戰多時殺斃賊匪六七十人鎗礮轟斃百餘人被火焚斃多人生擒賊匪十一名立時正法奪獲

二百斤洋礮一門子母礮二門抬礮鐵礮竹節礮
及鳥鎗長針挑刀鉛丸並打單印板等件牛馬八
匹賊勢潰散該鎮仍卽督兵進剿等情稟報前來
查此股賊匪分夥竄擾先經該鎮德亮及護新太
協謝陞恩等節次攻剿獲勝斬擒多名該匪膽敢
鋌險直撲龍州經該護協及文員等親率兵壯力
戰以致受傷溺斃實堪憤恨雖經該鎮馳赴應援
督飭痛剿共轟斃殲擒二三百人並奪獲礮位軍

械各件惟賊黨兇燄尙熾現復嚴飭該鎮會商道府督率在事文武激勵兵壯並多僱練勇探蹤飛速相機堵勦毋任奔突滋蔓護新太協左江鎮標游擊謝陞恩前在太平勦賊屢著戰功最爲勇敢此次直前攻擊奮勇捐軀署龍州廳土江州州同蘇勒芳阿署龍英土州同試用州判李懋莘均以文員勇往力戰受傷溺斃實堪憫惜應與武德隘剿賊陣亡之署該協左營千總事把總曾朝玉龍

憑營把總袁國璘一併仰懇

聖恩勅部從優議卹以慰忠魂所有太平另股賊匪經
該鎮將等督剿斬擒數百名被匪撲擁沙灘該護
協及文員等受傷溺斃緣由謹會同兩廣總督臣
徐廣縉恭摺由驛馳

奏伏乞

皇上聖鑒訓示謹

奏 咸豐元年三月初二日具

奏奉

硃批另有旨欽此

附奏覆陳

諭飭籌辦事宜片子

再臣等承准軍機大臣字寄奉

上諭有人奏廣西現調兵丁宜加防範有四可慮等語
有人奏因地制宜籌滅賊匪一摺又有人奏力行堅
壁清野一摺又片奏團練成效均著該大臣等悉心
體察妥爲籌辦等因欽此臣等謹將鈔給各原奏公
同閱看於粵西現在情形所言均多切要如現調

兵丁宜加防範等語臣等自抵粵後大兵雲集卽經嚴申軍律誥誡詳明誠恐駕馭無方甚或兵爲民害近來追捕所至各守營規尙無藉端搶奪諸弊至官兵習於行陣所長在攻鄉勇熟於道塗所長在捕彼此相資爲用均飭分起赴敵以絕推諉其楚兵土兵積習竝經嚴切稽查以防未然之患又如所奏因地制宜一摺廣西山水交錯无平不陂果能增險嚴守自能以少勝多惟狹隘荒脊之

區人煙寥落兵多則費無出兵少則力不支若十萬山一帶界連兩粵安南峭壁幽巖林深路雜更不可測臣等詳加諮訪檢閱輿圖似增險非難而嚴守爲難屢經札飭各屬各就地方險要隨處設法籌防使之人自爲守互相保衛得力當勝於兵所有大股匪徒正須合力剿辦其他股數實繁勢難逼困一隅且恐併成大股不得不量分緩急又如所奏堅壁清野一摺及團練成效一片溯查嘉

慶初年川陝教匪滋事久未殄滅直至堡寨整齊
賊始黨孤食盡臣等力持此說札示頻仍務期一
律照辦但地形廣狹較之西北不同卽經費盈虛
亦難今昔竝論必得良有司與民同體親歷村市
勸諭紳耆爲之擇地興築擇人董理貧者出力富
者出資庶幾次第有成以守爲剿至團練著有勞
績屢經據實上

聞仍當隨時激勵無令日久生懈臣等仰惟

宵旰軫念時艱凡可弭盜安民無不悉力籌商冀小補
於萬一而地方凋敝日甚州縣困苦異常有治法
必有治人惟當勉爲其難未敢迫求其效所有節
奉

諭旨欽遵辦理緣由謹附片縷陳伏乞

聖鑒謹

奏

硃批知道了欽此

附奏各土司州縣緝捕匪徒片

再查鎮安都康土司地方賊匪經署副將伊三圖
飭令外委左懷禮管帶兵勇迎擊鎗斃手執大旗
賊目一名該土州馮世勛團長生員廖釗裔等趕
帶壯練協助該匪卽行逃竄兵壯乘勢追殺殲斃
賊匪三十三名生擒呂聞一名奪獲刀矛籐牌多
件把總張承恩用長矛戮斃賊目一名並獲大旗
一桿又下雷土司山口灣賊匪經署歸順州陳慶

桂督同該土司及把總潘士傑等管帶兵壯馳剿
潘士傑先燃大礮轟斃執旗賊目一名並夥匪多
名兵壯奮勇前擊連施鎗礮賊卽潰逃外委張廷
瑞吏目方思訓等各帶兵壯追擊斃賊二十餘人
巡檢蕭逢源所帶壯勇格斃賊匪三名生擒二名
外委劉名登鎗斃騎馬賊一名共計殲斃四十餘
名擒獲帶傷者十二名奪獲五子礮四桿鳥鎗四
桿刀矛八十餘件籐牌旗幟數面兵壯亦受傷九

名又凌雲縣屬賊匪經該署縣陸崇瀛會營帶兵
率同紳團於正月初十日往捕用礮轟斃該匪七
十餘人生員李家錦等協力窮追生擒巨匪姚贊
斗馬玉等五人奪獲賊馬匹器械多件又東蘭州
屬賊匪經該州曹燮培督同兵壯及鳳山土練於
正月二十五日馳剿格殺騎馬賊目一名夥匪十
餘名奪獲賊馬二匹大小旗三面籐牌二面大礮
二門鳥鎗五桿長鎗刀鉤等十餘件該匪翻山逃

竄兵壯追捕又生擒賊匪三名二月初九日復在
玩石地方擊斃賊匪二十餘名兵壯亦傷斃數名
又橫州博合墟等處賊匪經該署州黃輔相率同
紳士邀集團練於二月初五日先在陳山村圍捕
開礮轟擊斃賊四十餘人生擒二十七名該匪放
礮回拒練勇亦傷斃二名受傷六名餘匪逃竄該
壯練等追擊又擒獲十六名格殺多名初六日賊
竄上石嶺村該署州復督紳練從後追襲賊卽驚

潰格殺六十餘名生擒五十二名初七日據紳民
探報賊首陳亞豬滿與妻妾並女四人及蘇三之
妻韋氏等在該處觀音巖藏匿洞口險窄難進卽
用礮一併轟斃割取首級十一顆呈驗初十日至
十五日該署州復經督率紳團沿村搜捕陸續拏
護首夥賊匪一百二十三名內有零巨光一名係
著名巨匪分別解訊正法又查博白縣境內賊匪
劉八一股颺擾二月初九日突至九歧徑經鬱林

州顧諧庚寅同博白縣游長齡厚集練勇奮力圍
剿殺斃夥匪數十人奪獲刀鎗簾牌數十件藍旗
一枝礮斃駟馬賊一人背插紅旗書有將軍頭張
二五字知係賊目割取首級報驗又生擒陳二一
名賊退蕉蔴墟初九初十等日又據外委李桂芳
及鄉勇人等擒獲盧八李晚朱三劉建興李五葉
晚等多名捉訊嚴辦均據先後稟報前來查此次
都康下雷兩土司及凌雲東蘭等州縣文武會督

兵壯士練擒斬賊匪多名奪獲礮械等件剿捕尙
屬奮勇又省橫州知州黃輔相督率紳練查拏賊
匪生擒殲斃共有三百餘名博白劉八一股人數
甚衆現經該州顧諧庚該縣游長齡督飭練勇剿
捕擒斬數十名並奪獲器械尤屬勇往有爲臣等
仍飭各屬隨時確訪兇拏不遺餘力以除伏莽並
激勵博白縣團練實力防截毋任奔竄謹會同兩
廣督臣徐廣縉附片具

奏伏乞

聖鑒訓示謹

奏

硃批另有旨欽此

附奏剿捕鬱林博白兩屬股匪片子

再查鬱林州博白縣屬有賊匪劉八凌十八兩股
先後竄踞經該紳團在九歧徑將劉八一股殲擒
數十人奪獲刀械多件業經另片

奏明二月十七日該州知州顧諧庚會同前貴州黎
平府知府朱德璣督率該縣知縣游長齡會帶紳
士團練分路進攻該匪恃眾抗拒職員朱允恭等
各帶壯勇奮力衝擊殺斃賊匪一百餘人該匪退

入蕉麻墟壯勇李春蔚殺斃賊目周八靈五二名
並奪獲身插藍旗二枝該匪復竄旺茂鴉山等墟
旋據練勇擒獲邱二等六名又凌十八股匪亦經
博白縣練長黃雲光等調集練勇於二月十三日
轟斃賊匪數十人賊復縱火焚燒練勇直前迎敵
自蚤至暮又斃賊匪一百餘人受傷者不計其數
練勇亦傷斃一百三十餘人賊即竄往陸川該署
知縣張琳會營帶練轟斃賊匪數人並於縣城附

近密速防守查兩股賊匪人數尙多節經臣等會
商酌派官兵協剿而武宣大營卽日相機開仗兵
力驟難分遣該州縣團練整齊尙稱得力臣等仍
飭官紳合辦厚集練勇以堵爲剿先行節節嚴防
謹會同兩廣督臣徐廣縉附片具

奏伏乞

聖鑒訓示謹

奏

硃批另有旨欽批

會奏官兵二次進剿武宣逆匪未能得手請

旨嚴議摺子

奏爲官兵二次進剿武宣逆匪轟斃賊匪二三百人
兵壯仍有傷亡籌辦未能得手請

旨先將臣等嚴加議處仍添調官兵練勇以資堵剿恭
摺由驛奏祈

聖鑒事竊金田大股逆匪竄踞武宣東鄉官兵於二月
十七日合力攻剿微有殲擒兵勇傷亡無多業經

會摺具

奏在案茲

臣

李星沅接准

臣

周天爵

臣

向榮會銜咨

報三月初二日籌商進剿先派東勇閩勇由南路
攻台村楚兵由中進攻三里墟之西候補知府劉
繼祖帶領各路義勇壯勇由舊縣直攻東嶺貴州
鎮遠鎮秦定三管帶黔兵由左邊夾攻三里墟之
北經臣周天爵臣向榮嚴定賞罰傳令各抒敵愾
是日已刻統領兵壯前進行近台村東勇義勇卽

由右邊衝入開礮轟擊壯勇由舊縣河岸踵至用礮夾攻該匪數千人扛抬大礮數十口由東嶺三里迎出拒敵彼此轟擊傷斃賊匪數十人臣向榮親督楚兵由右邊攻剿該首匪手執黃旗四面指揮匪等突出大隊分兩路包兵壯之後壯勇因賊匪抄襲先後奔潰東勇因執旗頭目一人被礮殞命勢難抵敵亦退出村外賊匪乘勢擁出臣向榮親督楚兵開放鎗礮連環火箭噴筒一齊施放復

轟斃賊匪數十人戰至申初逆匪愈出愈衆大礮
兇猛官兵四面受敵勢難取勝只得徐徐撤回查
點兵壯死者四五人傷者四十餘人此南三股麋
戰東嶺三里墟之情形也至黔兵緣山而進山谿
多伏步步結陣而前甫到平地賊伏林中如蝟遂
放火箭十餘枝無一動者見三里墟北頭樓上搖
旗賊遂蜂擁前來秦定三奮勇抵住黔兵火器齊
施斃賊二百餘人時已申刻南路皆退復見樓上

賊搖旗以一股追楚兵一股向北截黔兵歸路其
大頭目身穿黃衣下束紅戰裙者被黔兵一鎗打
死衆賊忿極盡棄火器短兵赤身來攻黔兵當之
被殺九名兵亦殺賊二十餘名俄而東北一帶賊
由山谷出者陸續無際黔兵被殺十餘人亦卽退
回查點兵丁死者二十四名重傷八名此北路黔
兵直攻三里壩迤北之情形也臣周天爵臣向榮
原擬四路夾攻兵壯齊進使賊首尾不能相顧以

期一戰成功似此籌辦布置臨期未能應手究係督剿不力惟有自行檢舉請

旨將

臣周天爵

臣

向榮嚴加議處另請明幹大員前來

督辦

臣

周天爵

臣

向榮亦不敢置身事外隨同竭

力辦理庶可剿捕得手等情前來

臣

李星沅查此

股逆匪本多剽悍亡命之徒前由大黃江墟棄巢

挈夥竄入武宣東鄉卽慮其未可輕視當與

臣

周

天爵

臣

向榮往復籌商仍合滇黔楚三省官兵及

本省兵勇前後密速圍剿詎該匪恃強裹脅仍復
兇狠異常兵勇兩次進攻均未能挫其逆焰在事
文武同深憤憾兼有會匪凌十八一股竄過鬱林
恐由大洋墟潛蹤入夥已飭署臬司楊彤如就近
飭探密商雲南臨元鎮李能臣扼要相機帶兵堵
截復飭桂平練勇爲助另由貴縣添僱練勇一千
八百名畱駐武宣大營其象州古城一帶仍飭貴
州署古州鎮李瑞管帶黔兵及各路兵勇實力嚴

防並飭右江道慶吉由賓州差次馳往象州駐紮
一面遵

旨咨商兩廣督臣酌派官兵若干隨同廣州副都統烏
蘭泰前來協剿並飛調湖南官兵一千名及咨催
雲南貴州官兵各一千名兼程來粵備用務期厚
集兵力分堵合剿庶不致蔓延滋患臣李星沅籌
剿不力應請

旨一併嚴加議處所有官兵二次進剿武宣東鄉逆匪

籌辦仍未得手緣由謹會同兩廣總督臣徐廣縉
合詞恭摺具

奏伏乞

皇上聖鑒訓示謹

奏咸豐元年三月初十日具

奏奉

硃批另有旨欽此

遵查知縣自盡實情竝將營員嚴辦摺子

奏爲遵

旨查明知縣自盡實在情形竝將堵剿不力之營員從嚴究辦恭摺奏祈

聖鑒事竊查前任賀縣知縣鶴年於上年五月間因賊匪竄入境內兵單餉乏情急自盡經前撫臣將署富賀營都司李慶什參

奏革職嗣於八月初六日奉

上諭前據鄭祖琛奏土匪竄至廣西賀縣境內署都司
延不進剿知縣愁急自盡當降旨交該撫澈底根究
明示勸懲茲又有人奏廣西流賊滋擾知縣受逼身
死平樂協副將卬凌阿富賀營都司李慶什千總劉
大剛勞玉榮聞風逃竄並閉城不出等語著鄭祖琛
按照摺內所指督飭該管地方文武各員迅卽分投
剿捕悉數殲擒毋任一名漏網並嚴查知縣鶴年因
何自盡卬凌阿李慶什等畏葸縱賊各情據實具奏

毋稍含混等因欽此當卽恭錄行司移行欽遵查辦
復經_臣等札飭該管道府嚴密確查茲據鹽法道
林士傅並平樂府知府玉銘先後查明稟覆_臣等
詳加察覈查上年五月間廣東英德匪徒由懷集
竄入賀縣滋擾該縣鶴年先赴信都辦理團練並
往官潭堵禦署富賀營都司李慶什以守城爲詞
並未下鄉堵捕鶴年旋因南鄉辦齊團練回縣捐
資募勇李慶什探聞賊匪欲從黃田八步撲城帶

兵往堵炭冲鶴年亦帶差壯前往會同李慶什進剿嗣於里松地方遇賊匪衝出李慶什督率把總劉大剛外委勞玉榮等帶領兵壯迎敵當用鎗礮轟斃賊匪二十人又有另股匪徒自山衝下兩路夾進兵壯團練間有傷亡旋回縣城防守賊匪竄至城外對河生員高載陽被賊擄去逼令進城赴縣代遞稟單聲敘廣東難民求賞盤費等語竝無索銀三萬兩船三十隻及攻城挾制之語高載陽

脫身進城亦未復出各文武因匪衆兵單仍卽緊
守城池待兵進剿適副將伊凌阿親帶弁兵抵縣
與鶴年等商擬乘夜渡河剿捕賊匪聞信卽由河
東逃竄伊凌阿復會督鶴年李慶什等管帶兵勇
跟追施放鎗礮擊斃賊匪二十餘人擒獲張純淇
等多名竝無閉城不出情事賊匪卽於六月十六
日由官潭墟一帶逃竄鶴年中途冒暑亦於是日
申刻回署因兵單餉乏民遭蹂躪賊匪未卽撲滅

心懷愁急遽萌短見至十七日寅卯之間在上房
簷前自縊身死典史金國泰稟經該府王銘查辦
當據傳詢鶴年妻弟常勝家丁張福客長鍾文江
等僉稱該縣實係因公情急短見輕生起獲親筆

遺書字條稟繳前撫

臣

奏報竝以該署都司李慶什剿捕不力

奏請革職欽奉

諭旨飭查該縣鶴年自盡日期係在官兵已到賊匪已

退之後其非因營員掣肘似無可疑現飭委員復
加查訪稟覆無異竝查已革署富賀營都司李慶
什及前署平樂協副將伊凌阿等尙無聞風逃竄
閉城不出情事飭據鹽法道林士傅取具該革員
李慶什親供會同署藩臬兩司覈明會詳前來臣
等查已革署都司李慶什身任武員禦侮是其專
責當賊匪入境之先知縣鶴年業已赴鄉集團李
慶什以守城爲詞未卽下鄉堵捕迨賊匪竄擾里

松帶兵抵禦復有損傷至鶴年自縊後又未能窮
追賊蹤一力奮勇剿洗實屬庸懦不職若不從嚴
究辦何以整肅戎行相應請

旨將已革署富賀營都司李慶什從重發往新疆充當
苦差把總劉大剛外委勞玉榮均請革職發往軍
臺効力贖罪前署平樂協副將伊凌阿雖查無畏
蕙縱賊各情惟該將身膺專閫未能迅速撲滅賊
匪咎亦難辭應請交部議處武營兵丁現經查明

尙無迎賊糾合之事應與被賊逼令遞稟之生員
高載陽均免置議所有遵

旨查明究辦各緣由謹會同兩廣總督臣徐廣縉合詞
恭摺具

奏伏乞

皇上聖鑒訓示謹

奏 咸豐元年三月初十日具

奏奉

硃批另有旨欽此

會奏請

旨迅賜簡放總統將軍督同剿辦片

再查粵西各路賊匪此時大小不下十數股仍以武宣逆匪爲最前因兵力不敷分遣經臣等會摺奏請添調精兵並以事關重大籲懇

特簡總統將軍來粵督辦極知

命將出師自由

乾斷况臣等均蒙

特派渥受

恩知惟期殫竭血誠和衷共濟以冀迅掃賊氛現在南
太各路仰蒙

聖懷屢念派令廣州副都統烏蘭泰竝湖北鹽法道姚
瑩前來分防協剿而軍情善變局勢易紛武宣大
股逆匪經臣周天爵臣向榮親督兵勇兩次進攻
僅能遏之不能北走探悉會匪人數實在衆多聞
東鄉七十餘村復多被誘徧脅以致賊醖愈張各

路官兵壯勇不如賊之拚死頗難一律用命楚兵
出征日久亦虞再衰三竭臣等昕夕籌慮憂心如
焚伏念粵西全局所關知而不言負疚益甚從來
大軍洊至必資總統全權臣李星沅奉
命專籌自知弗克負荷商酌至再惟有仰懇

聖恩垂念兵戎重任俯如臣等前請迅賜

簡放總統將軍管帶勁旅馳至粵西督同臣等剿辦無

任悚懼待

命之至謹合詞附片具

奏伏乞

聖鑒訓示謹

奏

硃批另有旨欽此

會奏添調川楚鎮將官兵片子

再_臣等此次遵

旨續調楚兵一千名查有湖南綏靖鎮總兵李伏夙稱
勇敢提標左營游擊成林熟習營務業經飛咨湖
廣督_臣湖南撫_臣卽令該鎮將管帶兼程來粵協
勦又四川相距較近擬卽飛咨四川督_臣挑備精
兵一千名遴委總兵管帶並派督標副將劉長清
前來該將勇練有爲協剿可期得力仰懇

命下遵行至臣等前請

飭調安徽河南兩省官兵數千名應否卽由
特簡將軍統帶來粵督剿祇候

欽定謹附片具陳伏乞

聖鑒訓示謹

奏

硃批另有旨欽此

會奏官軍進剿賀縣里松失利情形摺子

奏爲東西兩省官兵會剿賀縣里松另股賊匪先經
斃賊多名旋因遇伏縱火將備圍裹陣亡現飭道
員副將會同東省文武帶兵堵擊竝咨湖南提
臣
分兵來粵會剿恭摺由驛具

奏仰祈

聖鑒事竊查賀縣另股賊匪前由開建懷集竄入該縣
舖門卽由河東芳林至里松盤踞當經兩廣督臣

徐廣縉札飭督標參將左忻肇慶府知府蔡振武
竝肇慶協副將齋清阿等先後來西會同鹽法道
林士傳管帶兩省官兵壯勇合力進剿臣等恭摺
具

奏在案茲據該道縣等先後稟稱賊踞里松地勢險
阻探有竄出黃田之信卽酌畱兵壯防守賀縣城
池副將齋清阿參將左忻帶領守備劉恩錫薩國
亮及廣東兵壯九百名護都司郭維彪等帶本省

官兵四百名該署縣甯域帶壯勇三百五十名會
合東西兩省文委員所帶各路壯勇於三月初三
日自賀縣起程由半路墟前赴里松進剿時賊匪
已出里松佔住蛋家坪初五日卯刻該文武等嚴
整隊伍由半路墟至回面界遇賊對仗兵勇開礮
轟擊賊匪退回里松我兵奮勇前進奪駐蛋家坪
駐紮賊匪六百餘人撲來我兵從上擊下相拒兩
時轟斃賊匪百餘人兵壯微有損傷該匪敗退我

兵乘勝前追適有賊一股由六浮山一股由東笋塘抄出我兵之後卽分兵壯回堵官兵追賊至里松墟口又斃賊匪七十餘人不期左右另出賊匪兩股各二百餘人四圍放火風勢直撲我兵却退賊匪三面圍裹副將齋清阿參將左忻揮兵力戰喝稱退後者斬護都司郭維彪守備劉恩錫薩國亮及各員弁一齊努力向前時已日暮滿山火著賊匪愈殺愈多齋清阿肩中火箭猶拔箭手及執

旗賊一名左忻郭維彪均各手刃數賊與齋清阿
同時疊被刀鎗殞命守備劉恩錫千總侯建祁把
總梁興富邱先源外委郭安均急上前救護各受
重傷殞命守備薩國亮把總劉大剛各受重傷救
回其餘臨陣員弁受傷輕重不等旋據該縣飭尋
齋清阿左忻郭維彪劉恩錫四屍擡回齋清阿猶
手握斷刀餘皆怒目上視生氣凜然當備棺殮祭
奠等情稟報前來臣等接閱之餘心皆俱裂賊匪

逞兇抗拒竟敢設伏放火以致副參備弁各員同
被圍裹遇害實屬罪大惡極爲覆載所不容查賀
縣里松墟路通富川昭平懷集等縣及廣東之開
建廣甯湖南之江華道州等處均須加意防堵該
道林士傳業已親帶兵勇進駐鍾山四路總口與
肇慶府知府蔡振武相機籌辦臣等復飭平樂協
副將阿爾精阿帶兵二百名原派廣東參將丁振
剛帶兵三百名候補知府陳瑞芝帶勇五百名迅

速起到會剿竝准湖南提臣余萬清咨覆已派湖南游擊韓世禱帶兵五百名由江華直趨賀縣協剿務期激揚士氣鼓勇同仇滅此朝食以申公憤而昭

天討肇慶協副將齋清阿督標參將左忻身先陷陣毅勇過人護富賀營都司平樂協右營千總郭維彪守備劉恩錫千總侯建祁把總梁興富邱先源外委郭安奮不顧身臨陣捐軀實深慘惜相應奏懇

恩施勅部從優議卹以慰忠魂其傷亡兵壯查明實數
照例咨部并查是日弁兵壯勇有無畏縮先逃不
顧主將等獎切實稟復核辦所有兩省官兵進剿
賊匪失利將備各弁陣亡及現在會籌堵剿各緣
由謹會同兩廣總督臣徐廣縉恭摺由驛馳
奏伏乞

皇上聖鑒訓示謹

奏 咸豐元年三月念一日具

奏奉

硃批卽有旨欽此

會奏續調黔兵摺子

奏爲續調黔兵分剿恭摺奏

聞仰祈

聖鑒事竊臣等承准軍機大臣字寄奉

上諭重兵均駐金田各屬兵力頗形單弱該大臣等務
當通盤籌畫嚴飭各屬文武將弁合力兜撿勿致顧
此失彼等因欽此遵查廣西地形延袤賊勢紛歧各
處不可無兵各處不皆有兵現當武宣東鄉堵截

喫緊之際仍應厚集兵力甚慮顧此失彼南甯太平一路現經東省官兵剿捕欽州靈山匪徒地界毗連節飭地方文武將弁厚集兵壯團練以堵爲剿無任奔突其邊境界連越南之處業經照會該國王自行保衛以防土匪竄擾並查貴州安義鎮與百色較近復經飛速咨商撫臣喬用遷酌調該鎮標官兵一二千名遴委得力鎮將管帶卽由百色前來協同督剿伏候

飭下貴州撫

臣

遵照辦理以期行程迅速所有續調黔

兵分剿緣由謹會同兩廣督

臣

徐廣縉合詞恭摺

由驛具

奏伏乞

皇上聖鑒訓示謹

奏
咸豐元年三月二十一日具

奏奉

硃批另有旨欽此

會奏調派鎮將剿捕鬱博匪徒片子

再查賊匪劉八一股先經竄踞博白縣境該紳團
分路進攻殺斃賊匪一百餘名旋復擒獲賊目夥
匪多名又凌十八一股亦經博白縣調集練勇殲
斃賊匪一百餘人賊卽竄往陸川業經附片

奏明在案茲據署陸川縣知縣張琳先後稟稱凌十
八股匪潛薄城下分攻卽經該縣親帶壯練連放
鎗礮轟斃匪徒七十餘人賊始由縣東米場逃走

而劉入股匪復自鴉山墟欲來陸川搶掠當卽分調各堡團練馳往防堵旋接探報賊匪於三月初九日竄至離城四十餘里之烏石墟屯聚匪數盈萬勢甚披猖等情又賊匪凌十八因被陸川擊退竄擾鬱林州城該州顧諧庚正在博白督剿興業縣知縣張晉圭立卽密派武監生梁宗昌生員梁拱宸童生梁景勲等分帶練勇進攻三月初八日賊匪來至西望橋該縣卽督率頭敵迎擊施放大

礮轟斃賊匪數十人賊復大隊擁來該縣督催奮
勇進攻復斃賊匪二十餘人因左右兩路壯勇抵
敵不住生員梁拱宸童生梁景勲同時陣亡賊復
圍近州城幸城中兵壯鎗礮齊發轟斃賊匪百餘
人賊匪始退查點陣亡壯勇三十二名受傷八名
初九日鬱林州知州顧諧庚已由博白趕回設法
剿辦等情當經臣等飛調雲南臨元鎮李能臣曲
尋協副將王錦繡帶領滇兵二千名並飭署貴縣

知縣張汝瀛趕募練勇二千名及博白北流等縣
厚集團練添僱壯勇星夜兼程馳往酌量緩急情
形會同州縣文武合力分投攻剿以資捍衛謹會
同兩廣督臣徐廣縉附片具

奏伏乞

聖鑒訓示謹

奏

硃批另有旨欽此

會奏預防凌洪兩股逆匪竄合片子

再查各股盜匪聲息不盡相通卽與會匪亦每不相下會匪則勾結煽惑其黨最堅訪聞金田匪首洪泉卽洪秀全乃傳洋夷天竺教者其抗拒官兵初則寂無人聲旣而少出又繼而大至賊令極嚴進退分合有步伍且看清一步方走進一步甚有賊智非奇兵不能破之臣周天爵創爲坐戰蓋師背水陣之意所有水陸各要隘現仍嚴飭兵壯分

段扼要防守又凌十八一股亦係會匪尤恐與金
田逆匪竄合接應竝飭桂平平南等處厚集練勇
於紫荆山後路一律上緊嚴防謹附片具

奏伏乞

聖鑒謹

奏

硃批知道了欽此

會奏東蘭宣化等州縣拏獲匪徒片子

再查東蘭州屬游匪竄擾經該州曹燮培會營分遣兵壯團練於二月十五二十等日在岳口村及玩石那英等處格殺鎗斃賊匪九名生擒梁二等四名被賊拒斃壯丁張升等二名二月二十八日又會營督同那地土州等帶領兵壯土勇在勞石崗楞里村等處礮斃追殺賊匪二百餘名生擒賊目黃陸賊夥黃亞勝等共十三名並奪獲賊旗一

枝大小礮五桿賊馬十二匹火藥二擔鉛子三簍
被賊拒斃壯勇葉亞六一名又署宣化縣知縣李
天鈺會營帶領兵壯紳團於二月十七二十六及
三月初五等日拏獲首夥各犯賴大何可元李勝
采等二十三名又代理平南縣知縣周誠之督率
兵壯紳團拏獲賊目周大順等三名匪黨謝社勝
杜士佳等九名又署蒼梧縣知縣張凱嵩督飭團
練差壯陸續拏獲盜匪鄒沈詩等十八名又柳城

縣屬賊匪竄入那見村擄掠經該村團練於二月初五日格斃賊匪二十六名生擒鍾景唱等十九名解縣訊辦並奪獲硝藥鉛子器械旗幟等件又賓州知州陶錫圭訪聞首匪韋添芬及其夥黨潛回立即會營帶領兵壯紳團馳往圍捕韋添芬棄馬跳河生員覃鴻保下河追拏被犯拒傷隨經壯丁幫同將該犯韋添芬截傷殞命並將護身夥黨八名殺斃又橫州與靈山縣連界現值廣東提臣

帶兵剿匪該署州黃輔相前赴赤水嶺防堵於三月初七初九兩日拏獲奸細楊春勝一名匪犯鄧文吉等八名並起獲鉛彈復於十二日親帶練勇直出州界彰高村會同堵剿殺斃執旗賊一名奪得大旗一桿上書廣義堂偕富濟貧七字團長監生謝昌隆殺賊五名力盡身亡又割得賊匪首級四顆生擒賊目賴明光一名又養利州於二月二十九至三月初一等日賊匪撲攻州城該署州郁

靜涵會督營委各員及兵壯紳團極力用鎗礮火藥抵禦先後轟斃賊匪共一百二十餘名奪獲馬二匹器械三十多件竹梯一百零四架除批飭各屬訊明各犯分別懲辦外臣等仍飭確查兜拏務期有犯必獲以靖地方毋稍疎縱謹會同兩廣督

臣徐廣縉附片具

奏伏乞

聖鑒訓示謹

奏

硃批知道了欽此

會奏籌畫軍餉片子

再臣等接准戶部咨行議覆廣西續請軍餉八十萬兩先經指撥三十萬兩應於此次劃抵實撥銀五十萬兩等因仰蒙

皇上垂念軍儲俯准依議跪領之下欽感曷勝查廣西
羣盜如毛東奔西突誠不能以無數之賊預調無
數之兵又不敢以有數之兵重費有數之餉惟賊
多則需兵多兵多則需餉多官兵例給本不貲加

以長夫餘丁及僱募各路壯勇爲數實繁臣等每
遇徵兵勢非得已固知當費不可省然一念及
帑項量入爲出歲有常供安得不涸之源以資無窮
之用卽現准部撥八十萬兩內除歸還司庫墊用
軍需銀二十餘萬兩尙存五十餘萬兩覈計軍用
不足三月又當先期上請且指撥省分有遠近庫
藏亦有盈虛解運未必依時支放何能刻緩前請
分局收捐原爲軍需起見無如賊氛未息人有戒

心遠者憚於挈貲近者素無殷富殊難望其小補
兵數日衆餉項日增

國用攸關何以爲繼然不寬爲籌備必致臨事周章
展轉思維苦無長策現當武宣逆匪拚命相持尙
須厚集兵力相機進剿以次分起籌辦未能計期
蒞事此則臣等拊膺棘手憂懼交深者也謹附片
縷陳伏乞

聖鑒謹

奏

硃批另有旨欽此

會奏暫留黔餉接濟軍需摺子

奏爲軍需待用甚殷暫留黔餉以資接濟恭摺由驛
具

奏仰祈

聖鑒事竊臣李星沅等前請撥餉三十萬兩仰蒙

諭飭臣徐廣縉於關稅等款內先行籌撥二三十萬兩
迅解廣西軍營嗣經戶部議奏仍照所請數目指
省撥解卽於續請八十萬兩內劃抵等因伏查前項

餉銀業經臣徐廣縉遵

旨籌撥二十五萬兩並截畱西稅銀十萬兩先後濟用
數已有盈無絀茲據署藩司吳鼎昌稟報各糧台
需用浩繁現在庫中除支放本省夏季兵餉外所
存無幾其奉部指撥之款湖北解到銀一萬三千
兩餘尙無解到者軍需緊急勢不能支臣等往復
籌商查有廣東委解貴州餉銀十三萬兩道經廣
西係爲黔省秋間支放冬春兩季兵餉之用爲期

尙寬而此間相需甚迫不得不暫行借畱一面據
實上

聞懇

恩敕部於續撥餉銀數內指明某省徑解貴州歸款俾
廣西暫濟急需貴州餉亦無悞除札飭署藩司及
廣東委員遵辦外所有暫畱黔餉接濟軍需緣由
一謹合詞恭摺由驛具

奏伏乞

皇上聖鑒訓示謹

奏 咸豐元年三月二十二日具

奏奉

硃批另有旨欽此

會奏據實查參已革廣西巡撫鄭祖琛摺子

奏爲遵

旨查復據實 奏參事竊臣前次欽奉

上諭飭查鄭祖琛前在巡撫任內周旋粉飾各情斷不可稍有其實不盡等因欽此茲復欽奉

上諭著李星沅周天爵遵照前旨將鄭祖琛遷延徇庇各情迅卽據實參奏毋得稍有隱飾等因欽此遵查

鄭祖琛在巡撫任內四年廣西賊匪萌孽道光二

十二三年業已顯露其端漸至橫溢潰決鄭祖琛
豈無聞見何不早圖善策弭禍無形臣嘗面爲詢
及據云抵粵後於各屬盜劫重犯隨案懲辦均有
奏案可憑特參疎防員弁約二十七人咨移參
革尙不在內等語經臣嚴密確訪并於紳評輿論
再三參核往歲賊初起時黨夥未衆州縣能緝捕
者將備有膽氣者其力猶可及止鄭祖琛雖經飭
辦不獲上緊芟除此遷延之咎也地方官諱盜爲

竊由來久矣果能痛懲此習立予嚴參其據實申
報者明加獎叙自是弭盜之法鄭祖琛久於其位
未能挽回積習此徇庇之咎也至通省文武員弁
凡剿捕不力關茸無能者自應早爲參劾以示懲
戒鄭祖琛責在整飭廣西吏治未見秩然改觀卽
如已革提督閔正鳳操防懈弛泄畚苟安曾有勸
其劾奏者鄭祖琛見好同官優容無間此周旋粉
飾之咎也臣於鄭祖琛奏帶隨營並未差遣委用

無所庸其迴護亦非故爲苛求要其見幾不先除
惡不盡曠官貽誤厥咎奚辭臣渥受

恩知務求核實斷不敢稍有隱飾自外

生成謹據實參

奏伏乞

皇上聖鑒訓示謹

奏 咸豐元年三月二十二日具

奏奉

硃批另有旨欽此

奏報親往武宣督剿摺子

奏爲武宣前後兩路堵剿喫緊臣卽日親往會籌擇要督辦恭摺奏祈

聖鑒事竊查金田逆匪自二月初十等日竄入武宣東

鄉撫臣周天爵提臣向榮同駐該縣督剿與臣往

復籌商官兵兩次接仗尙未得手節經據實具

奏竝請

飭部嚴加議處在案連日探悉賊情查閱各犯供詞所

云逆匪欲分三路逃竄一由平冲至貴縣一由大林至象州一至脩荔等語又欲與貴州官兵打仗直上柳州鹿寨如賊敗卽由東鄉回竄紫荆山新墟出平南思旺走大烏墟及紮籐南渡等語據逆匪分夥於初十十七等日竄近勒馬渡因張劍勇船開礮轟斃多名餘皆逃回是其意圖他竄已與犯供相符復經會飭各路加意嚴防武宣現資重兵而前後兩路兵力較單防堵尤須扼要查武宣

與象州唇齒相依實爲全局筭鍵臣擬卽日移營

先至象州察看再至武宜面晤撫臣提臣熟商賊

由何處衝突卽於何處攻剿其後路紫荆山一帶

仍飭桂平平南等縣帶同壯練周歷各口巡防至

柳州本營弁兵旣須責令畱守外營兵亦無可分

臣惟僱勇數百隨行竝令象州紳團上緊厚集練

壯如武宣刻期開仗臣當暫爲畱駐查探賊踪會

督分起迎截仍飛催續調官兵到日相機督辦所

有堵剿喫緊親往會籌緣由謹具摺陳

奏伏乞

皇上聖鑒訓示謹

奏 咸豐元年三月二十八日具

奏奉

硃批另有旨欽此

會奏查參鎮道知府各員摺子

奏爲遵

旨查參總兵道府竝特參廢弛之知府分別革職恭摺
奏祈

聖鑒事竊臣等於咸豐元年三月初七日准軍機大臣
字寄咸豐元年二月二十二日奉

上諭右江鎮總兵惠慶右江道慶吉所屬賊匪肆擾自
上年以來竝未聞該鎮道如何調度如何親自督剿

是否株守偏隅一籌莫展著該大臣迅卽查明據實具奏又頃有人奏署桂林府糜良澤貪鄙狡猾工於趨承鄭祖琛受其欺朦若如所奏令其辦理糧臺必致貽悞該大臣等畱心察看倘有劣蹟卽行參辦等

因欽此

臣

等查得右江鎮總兵惠慶才具本屬平

常於邊地賊匪滋擾未聞設謀調度漸收成效右

江道慶吉庸懦無能形同木偶

臣

等察看該員於

地方盜賊情形不過爲人轉稟竝不能設一合機

宜之策誠如

聖訓實屬株守偏隅一籌莫展署桂林府知府糜良澤
貌似有才心縈勢利自鄭祖琛任內調署茲缺凡
事恐拂上官之意雖查無貪劣實蹟而聲名甚屬
平常輿論亦多不協又潯州府知府顧元凱心性
粗鄙亦鄭祖琛所深許公事諸多廢弛實難望其
振作該員雖未奉

飭查當軍興用人之際一官須得一官之力未便許其

濫厠相應請

旨將右江鎮總兵惠慶右江道慶吉一併革職署桂林府知府糜良澤潯州府知府顧元凱一併革職永不叙用其所遺右江鎮右江道員缺請

旨迅賜簡放以重職守所有

臣

等欽遵查明竝據實

奏參緣由謹會同兩廣督

臣

徐廣縉合詞恭摺具

奏伏乞

皇上聖鑒訓示謹

奏 咸豐元年三月二十八日具

奏奉

硃批另有旨欽此

附奏會籌勦辦不敢稍存觀望片子

再臣欽奉

上諭特命賽尙阿及巴清德達洪阿馳驛前往湖南廣
西交界地方督辦防堵事宜李星沅周天爵向榮接
奉此旨不得以朕特派有人稍存觀望等因欽此臣
謹受

恩知同膺

重寄每遇徵兵籌餉仰蒙

廬念戎行無微不至曷勝感激思奮惟粵西全局糜爛
賊匪縱橫經臣疊次據實奏

聞前請

特簡總統將軍原期事權專一仍當竭力隨辦實未敢
意存諉卸臣以柳州地勢各路聲息相通軍情可
期兼顧

奏明扼要分防先與提臣向榮籌剿金田逆匪二月
初間官兵連獲勝仗賊竄武宣東鄉提臣帶兵追

至撫_臣周天爵亦駐該縣督剿與_臣逐日函商因

周天爵小病_臣擬馳往相代旋據百稱就痊仍約

相機進止現當以守爲戰武宣前後兩路防剿最

爲喫緊兼聞兵將練勇彼此每不相下自須親往

查察作其氣而使之平現計原調官兵七千名合

之續調官兵共一萬三四千名惟當迅速分路催

齊酌量緩急情形會籌策遣剿辦斷不敢以

特派有人稍存觀望謹附片縷陳伏乞

李文恭公奏議

卷二十二 使粵

六

聖鑒謹

奏

硃批覽欽此

會奏覆陳

飭發奏單事宜竝查覆張敬脩等分別飭調詳查片子
再臣等前奉

飭發大學士刑部尙書杜受田奏單於廣西受害之由
被害之處與夫救害之方無不言之切中內如整
軍容募精勇勸鄉團察地形務解散五条多有現
已舉行亦有尙須酌行者容當隨時體察分別飭
辦廣東兵勇強於粵西如候補知府張敬脩前經

臣等遵

旨飭調來粵人極明練勇敢所帶東省莞勇近在武宣
隨同打仗最爲得力象州舉人韋正元等上年僱
募耆壯協同官兵殺賊未獲議叙臣等一面札查
近復酌給功牌傳諭該舉人等於州境扼要地方
集團防堵如有成效卽當奏懇

恩施博白團練最優紳士朱德華朱德鏌王汝諧等實
司其事上年正月二月九月鄉兵三次踰境先後

在合浦鬱林地方殺賊六百餘人容再覆查核

奏貴縣宣化屢獲要犯團練之力居多至官兵何地
何時不能救應該團未經據報有案江蘇候補道
周燾已由本籍呈明因病不能遠出香山縣武舉
韋允升現在隨營效用當再遵

諭查察不敢稍爲遷就再奉

飭查提臣張必祿所帶員弁健丁另繕清單恭呈

御覽謹附片縷陳伏乞

聖鑒謹

奏

硃批知道了欽此

會奏剿捕賀縣鬱林陸川各股匪徒情形片子

再查賀縣溫大貨五一股前在里松拒捕將備陣

亡卽經_臣等飛飭鹽巡道林士傳平樂協副將阿

爾精阿廣東參將丁振剛等會督兵勇跟蹤追剿

賊匪於三月初七八日由里松翻山繞入南鄉十

二日竄至懷集縣屬之古城團練生員梁鳳喈等

率團堵禦接仗互有傷亡十三日賊由竹墟竄赴

藍洞該縣李萱會營帶兵並舉人曾宏仁起集團

丁預藏地雷木礮賊至燃礮轟擊斃賊二十餘人
又殲斃騎馬賊首一人生擒夥賊孫義等七名奪
獲大礮二位馬一匹刀牌多件賊由牛欄山合夥
竄去旋因賀縣開建兩處均有官兵追剿仍由懷
集奪路奔逃十四日竄至馬凝墟十五日竄至慈
樂墟臣等復經飛催東西各路兵勇趕緊前截後
追合力圍剿毋任此擎被竄又凌十八一股竄擾
鬱林州城三月初九日鬱林州知州顧諧庚由博

白趕回攻剿據稟該匪圍踞城外五里該州會督
北流興業及本州團練丁勇疊次進攻殺賊甚多
丁勇亦多傷損賊圍尙未解散其劉八一股竄至
陸川縣離城三里之萬丈坡屯住焚掠臣等前調
雲南臨元鎮李能臣等管帶滇兵二千名竝飭署
貴縣張汝瀛募帶練勇二千名前赴援剿計日已
經到齊復札署臬司楊彤如由潯州府督帶員弁
壯勇四百餘名馳赴鬱林會督剿辦謹會同兩廣

督臣徐廣縉合詞附片具

奏伏乞

聖鑒訓示謹

奏

奏報馳抵武宣察看情形摺子

奏爲馳抵武宣察看情形會籌勦辦恭摺奏祈

聖鑒事竊查武宣東鄉逆匪經官兵連次接仗尙未得

手業將臣移營會辦情形恭摺具

奏在案茲於初一日由柳州府起程初三日行次象

州接見該署州知州彭作檀據稱三月二十三日

有賊匪數百人竄入古董古蓬地方經官兵壯練

合力堵禦仍卽退回東鄉等語查該匪踪跡靡常

王與漢人更無異似不耳臣等竊以爲是貴州古
州鎮總兵李瑞等加意嚴防不得稍存疎懈其武
宣東鄉大股逆匪現踞三里墟防勦極爲喫緊臣

卽於四月初四日馳抵武宣面晤撫臣周天爵提

臣向榮同心協力商量勦堵不敢稍存推諉並激
勵各營將弁及在事文武奮勇上前相機兜剿以

期迅掃賊氛上紓

宸廑再臣等奉

諭飭辦廣西省輿地全圖並賊匪竄踞之處容與撫臣

周天爵確切查明逐一繪圖貼說恭呈

御覽謹繕摺馳

奏伏乞

皇上聖鑒訓示謹

奏 咸豐元年四月初七日具

奏奉

硃批知道了欽此

奏報滇兵進剿鬱林州會匪連獲勝仗摺子

奏爲滇兵進剿鬱林州會匪凌十八等連獲勝仗已
挫賊鋒恭摺由驛馳奏仰祈

聖鑒事竊照另股會匪凌十八等竄至鬱林州攻圍州

城經臣等調派雲南臨元鎮總兵李能臣曲濬協

副將王錦繡統帶滇兵二千名署貴縣知縣張汝

瀛募帶練勇二千名並飭署臬司楊彤如由潯州

府帶兵一百五十名壯勇四百名俱馳赴鬱林州

會督剿辦業經

奏報在案連日接據署臬司楊彤如臨元鎮總兵李
能臣等稟稱會督兵勇於三月二十二日偕抵鬱
林州近城之福縣墟駐紮查看地勢并探訪賊情
惟鬱林州城西南兩門外賊匪屯聚衆多匪首凌
十八及陳十六賴八皆高州欽州人與本地土匪
梁二十梁十八等勾結合黨約五六千人圍困州
城凌十八等屯聚西門外文昌閣一帶陳十六等

亦分屯南門各處連日據滇兵拏獲賊探奸細張
十一鬱林團練壯勇拏獲匪犯胡八陳二陳四提
標署守備秦如虎拏獲賊探奸細盧亞潰等五名
並據供稱凌十八等聞有官兵來到欲由北流竄
往貴縣轉赴武宣會合韋正等入夥餘供與探報
情形相同當將該犯等卽於軍前正法該鎮等會
督兵勇於三月二十四日拔營進至離州城十五
里之浮嶺墟安營駐紮二十五日卯刻該鎮會督

文武齊集兵勇商定該鎮李能臣親督滇兵八百名直攻西門外文昌閣一帶賊匪飭鬱林州知州顧諧庚帶所僱博白壯丁四百餘名及按經歷鄭泉帶東勇一百名州同鄭延禧巡檢吳虎林督同東省紳士何步丹等帶虎勇一百名均隨同接應又派曲潯協副將王錦繡督率滇兵五百名專攻南門外賊匪飭紳士楊家傑帶博白壯丁六百名隨同接應又派署貴縣張汝瀛督同委員紳士帶

練勇二千名分作三隊繞赴東北兩門外抄攻賊
後該署臬司楊彤如督同興業縣知縣張晉圭提
標署守備秦如虎等率帶兵勇親督後陣查看打
仗情形隨時策應是日巳刻副將王錦繡一路兵
勇行近南門外三四里卽遇匪衆來迎各將弁督
同兵壯連放鎗礮轟斃賊匪百餘人該匪退縮各
將弁及紳士職員楊家傑督率兵勇奮力直前又
擊斃賊匪二百餘人割取首級二十八顆耳記二

十七枚生擒賊匪十五名奪獲大礮藥鉛器械無數賊始退入巢穴固守兵勇見其礮眼環列不敢遽進該副將將兵收回查點陣亡兵丁一人受傷二人李鎮督率兵勇直攻至相近西門外二里許匪衆分數股迎敵並松林內俱有埋伏潛出窺探滇兵燃放大礮三四次轟斃賊匪數十名賊匪分頭擁出兵勇分隊攻入又擊斃賊匪百餘名賊匪退縮滇兵直攻至近城橋邊見各處松林俱有賊

匪滇兵卽放大礮轟擊該匪不敢擁出該鎮恐中埋伏飭令滇兵紮住以連環鎗礮轟擊間發火箭該匪亦拚命拒敵致陣亡虎勇一名其餘壯勇亦各潰散該鎮復親督滇兵迎上時已酉刻未敢攻入卽將兵壯緩緩收回查點兵壯無甚傷亡僅有二名尙未回營該署臬司楊彤如親自督陣在附近高嶺親見打仗情形大概會匪不比盜匪盜匪一經擊敗卽紛紛逃散而會匪則拚命相拒與金

田會匪相同各處壯練遇此狠戰每多潰散惟李
鎮督帶滇兵紀律整齊始終無懈王副將所帶弁
兵尤爲奮勇所以大獲全勝因次日陰雨暫息一
日二十七日卯刻該鎮李能臣署臬司楊彤如復
會督文武帶領兵勇分三股進攻因探得該匪分
伏附近各村內當飭兵勇一路搜捕步步逼進該
匪伏聞鎗礮不出拒敵兵勇奮勇攻擊約兩時許
該匪忽分十餘股撲出該鎮等卽將兵勇亦分十

餘股攻入該匪拚命拒敵兵勇奮力攻擊鎗礮齊放自午至酉擊斃賊匪數百名鬱林州知州顧諧庚親督練丁生擒賊匪先鋒黃三黃八二名該匪敗回巢穴固守該鎮等因天色已晚將兵勇分起緩緩撤回二十九日該鎮等復會商派滇兵提標兵鬱林兵並鬱林州顧諧庚所僱義勇及按經歷鄭泉東勇分爲六隊相繼左右而進併攻西門之南路文昌閣一帶賊匪派署貴縣張汝瀛興業縣

張晉圭督同訓導朱允恬等帶領團練由西門之西路西望橋抄入派紳士楊家傑帶博白壯勇繞攻東門該鎮與署臬司楊彤如親自督陣帶去開山大礮二位並派州同鄭延禧巡檢吳虎林帶領虎勇會同滇兵爲後路接應卯刻分起前進約近賊巢兵壯左右分隊先將附近各村搜捕該匪卽分黨於文昌閣旁大樹下設立礮位聚匪五六百人拒敵至午刻該匪分出四股每股各一二百人

一抄東勇義勇一抄滇兵右隊一抄滇兵左隊一抄鬱林兵壯並於中路田內衝出一股約二三百人蜂擁而來該鎮卽親燃開山大礮轟斃賊匪多名該匪退回屯聚田塍移時該匪五股齊出勢甚兇猛鬱林客勇卽開礮轟擊該匪復分股抄兵勇後提標署守備秦如虎遙見卽帶提標兵一百五十名直抄賊尾施放抬礮連斃數匪賊勢退却繼復擁撲該署備卽策馬督兵衝入賊隊州同鄭延

禧巡檢吳虎林督帶虎勇並滇兵相繼衝擊左右
夾攻殺斃賊匪多名該匪收退署守備秦如虎匹
馬追及連砍數賊被匪用竹鎗戳傷胸膛并鳥鎗
打傷右腿該署備負痛力追復殺數賊旋經兵勇
趕至將此股賊匪盡行殺斃該署備猶欲另追他
股賊匪因怒血奔心頭暈隊馬吐血數口不能言
語經兵丁救醒抬回大營用藥灌治始愈兵丁受
傷三人其另股賊匪用籐牌遮護兩面衝來滇兵

施放擡礮打斃賊匪三四十人該匪仍步步逼近
鬱林州顧諧庚督率義勇按經歷鄭泉督率東勇
上前攻擊連砍數賊該匪暫退旋復撲至經滇兵
開放連環鎗礮擊斃數十名東勇義勇滾舞籐牌
衝入賊隊與滇兵共砍斃賊匪一百數十名惟時
見賊隊內有坐轎一賊年近七旬頭戴方巾手執
拂塵指揮衆賊被東勇趕上殺散轎夫立時砍斃
割取首級該匪潰敗奔逃兵勇奮力追至橋邊該

匪架礮極力堵禦該鎮等將兵勇徐徐退回署貴
縣張汝瀛興業縣張晉圭督同訓導朱允恬吳裕
紳等帶領團練自西路分五隊由長洪村夾攻擊
斃數匪奪獲子母礮二口斬獲首級三顆紳士楊
家傑帶領博白壯勇繞攻東門擊斃賊匪七八十
名均獲勝仗其東勇殺斃之坐轎賊匪當提前獲
賊匪指認據供該匪係博白王晚一名索倫晚爲
賊營軍師羣賊聽其指揮等語現在該鎮等會商

機宜趕緊乘勝進剿等情稟報前來臣等當以官兵既連獲勝仗賊鋒已銖惟不能直逼巢穴者因賊於踞據民房週圍俱挖礮眼官兵不敢近擊之故此後機宜非火攻不可業已函致李鎮相時爲之據稱署守備秦如虎驍銳善戰忠勇之氣鬱鬱勃勃的是出眾之才相應請

旨賞戴花翎卽以都司陞用至東勇砍殺王晚俟臣查明再行獎勵所有三次接仗連獲勝仗緣由謹會

同兩廣總督臣徐廣縉合詞恭摺具

奏伏乞

皇上聖鑒訓示謹

奏 咸豐元年四月初七日具

奏奉

硃批另有旨欽此

會奏西林縣城失守竝查參失守各員及調派

鎮將督剿摺子

奏爲西林縣城驟被盜匪擁入搶掠衙署民家旋即
退出失守城池文武及該管知府一併革職拏問
恭摺由驛奏祈

聖鑒事竊臣等前據右江鎮總兵惠慶稟報三月初十
日接據護理上林營都司馬正標稟稱二月二十
九日辰刻凌雲縣河口首匪陳三統帶匪黨數百

餘人行抵西林欲來城滋擾情事當卽會同縣令
文滋盛典史邵治千總朱雲把總楊錦魁督帶兵
壯迎敵敗退該匪入縣署將班房犯人放出擄去
縣庫公項銀兩一空殺斃壯練數十人次進都司
署內掠去庫存軍械火藥鉛彈馬匹三月分官兵
俸餉等項又進捕署千總署擄去銀物一空并搶
街坊數十家所有失去文武衙署一切款項尙未
查明該匪三月初一日始退八渡地方等因又據

署泗城府知府徐埴稟稱三月初八日據西林縣典史邵治稟報事同前由竝稱賊踞較場扼守各路以致文報不通該府聞報卽於初十日督帶壯練自郡起程馳往督辦途次接據探報該匪揚言欲從小路攻襲郡城因泗郡旣無城垣存城兵壯亦復無多防守更關緊要仍行折回飛飭凌雲縣知縣陸崇瀛添調團壯分布防堵再行追剿等情臣等接閱之餘實深駭異查該匪本自無多何

致滿城文武據城不能固守數百賊匪頃刻而進
如入無人之境恣意搶掠該文武竟逃往何地誠
屬天下未有之事而總兵惠慶託名防堵潘大竝
不帶兵赴敵迨至四月初二初三兩日臣周天爵
始接到該府徐埭該鎮惠慶稟咨來文失守城池
遲延至月餘之久皆非情理所有且該守稟稱賊
匪揚言來撲郝城豈有一聞恐嚇不卽查實而卽
退回之理顯係虛捏除一面飛飭署右江鎮標中

營遊擊馬芳春同慶遠協都司德慶管帶兵丁五百名星夜馳往會剿竝咨雲貴督撫臣轉飭連界各文武嚴密防堵外相應請將西林城守文武及知府徐埭一併革職拏問俟審明失守者一面請旨一面卽行正法肅軍威而正綱紀莫要於此所有賊匪擁入西林縣城刦掠衙署民房現飭鎮將親往督勦緣由謹會同兩廣督臣徐廣縉恭摺具奏伏乞

皇上聖鑒訓示謹

奏 咸豐元年四月初七日具

奏奉

硃批另有旨欽此

會奏進剿大勝堂股匪連獲勝仗摺子

奏爲進剿大勝堂賊匪連獲勝仗殲擒首夥殆盡籲
懇

天恩獎勵有功恭摺奏祈

聖鑒事竊照廣西左右江一帶盜賊充斥有大勝堂賊
匪潘大等於思恩南太交界地方出沒竄擾迭經
嚴飭該文武會督勦捕茲據百色廳孫蒙隆安縣
李葆初先後稟報三月初二日該匪率領夥衆由

果化竄至土上林墟經該廳會同郅護雲南武定
營參將都司李廷楷署守備楊致英代理奉議州
易見心帶領兵丁及謝錫祥新投誠之壯勇分投
剿捕該匪恃眾撲拒兵壯鎗礮兼施殺斃賊匪二
百餘名生擒三十七名並據壯勇謝錫祥姚有高
陳鵬時等斬獲著名首匪蘇晚潘六等首級五顆
奪獲大礮一口籐牌刀桿多件賊匪敗退初三日
該廳等復率兵壯進攻該匪捨命拒敵自辰至酉

鏖戰六時殺斃賊匪三百餘名生擒九名奪獲小礮數口馬二匹刀桿數十件該匪退踞土上林墟因賊匪衆多兇悍致傷兵壯七名初四五六連日陰雨未能進攻用礮轟斃河邊瞭望挑水賊匪二十餘名初七日天氣晴霽各路兵勇分投進剿該都司李廷楷該州易見心帶領兵丁並壯勇謝錫祥等由河邊沙路前進鄒天保縣知縣劉伯墳密令張國樑等於坡脚石路前進署守備楊致英署

千總戴玉魁鍾振揚把總李文瀚外委楊燕黃建廷等率領兵丁及百色獍勇王卜同等由圩後田洞前進該廳孫蒙由達瀨大路督率催僮該匪分股四出拒敵各兵勇鎗礮齊施刀矛並舉轟斃賊匪一百十餘名生擒數名初八日復會齊攻勦用火筒竹銃燒斃該匪左右先鋒二名殺斃賊匪數十名又用礮轟斃賊匪二百餘名奪獲刀械無算並殺斃手帶金鐲腰繫五色綢帶巨匪一名據張

國樑謝錫祥等查係首匪潘大餘匪連夜奔竄十
一日餘匪數百人逃至山心因該處有把總脫方
慶帶領兵壯駐紮堵截該匪遂紛紛斃水過河適
外委梁兆清同張國樑帶領兵壯跟踪追至該匪
力奔上岸迎敵當經張國樑點放五百觔銅礮轟
斃賊匪三十餘名受傷落水者不計其數該匪仍
用籐牌攔護擁前拒敵因把總脫方慶帶兵乘船
追至團長拔貢生陸鵬泰生員梁位興陸元章民

人成允昭等帶領團練前來接應該匪三面受敵
遂向前奔竄兵壯團練合力尾追至果化土州隴
督村地方天將傍晚該處有代理果化土州趙秉
儀竝其弟趙秉恭督帶隴督崗民千餘在山坡堵
截該匪不能前進又不能退後遂挺而走險四面
衝突經張國樑趙秉恭分帶兵壯團練奮勇夾攻
殺斃賊匪五百餘名奪獲大礮十尊子母礮六口
籐牌長針多件餘匪竄逸無多現在分投搜捕於

附近各山崗搜獲夥匪黃汶等六名並聲明此次
連獲勝仗張國樑謝錫祥趙秉恭尤爲出力等情
臣等查張國樑卽張家祥謝錫祥卽謝長腰四原
係盜犯乃一經悔罪投誠隨同官兵勦捕賊匪卽
能將大勝堂賊匪殲除實屬奮勇可嘉除批飭署
南甯府知府鄒嶧杰查明殲斃首匪是否實係潘
大另行核辦外合無仰懇

天恩寬宥張國樑謝錫祥等應得之罪仍懇格外

天恩將張國樑以千總補用賞戴藍翎謝錫祥趙秉恭
均請六品頂戴且張國樑等罪固難容才亦可用
自必激發天良愈知奮勇不但於此時軍務大有
裨益將來肅清江面亦非此等人不可除仍飭該
文武嚴密搜捕務將逃散餘匪全獲究辦以絕根
株外所有殲除大勝堂賊匪緣由謹會同兩廣督

臣徐廣縉恭摺由驛馳

奏伏乞

皇上聖鑒訓示謹

奏奉

硃批另有旨欽此

會奏懷集陸川博白等縣剿捕匪徒片子

再查溫大貨五股匪前於三月十五日竄至懷集縣屬之慈樂墟經臣等飛催東西兩省兵壯前後夾擊旋即竄至梁村盤踞數日於二十日午刻全夥直撲縣城該署縣李萱因各路兵壯尙未到齊先已會營選派兵壯五百餘名預備磚石灰包等件統於城墻垛口嚴密巡防并在來路要口埋藏木礮迎面轟擊斃匪十餘名賊勢稍却卽於對河

屯集二十二日平樂協副將阿爾精阿廣東參將
丁振剛署賀縣知縣甯域等帶領兵壯先後馳抵
懷集縣城正在會商進剿詎該匪聞風燃放大礮
佯爲渡河抗拒該文武等分點兵壯嚴整以待不
料匪等忽分兩股潛由陸路逃竄復經臣等嚴飭
該將等跟踪追擊並飛札藩司勞崇光迅由梧州
酌帶兵壯馳往督剿俾無鬆勁其劉八一股連日
在於陸川縣城附近村庄分夥焚掠經各村團練

先後殺斃賊匪二十餘名並斃賊首二名奪獲鎗
礮藤牌刀矛多件賊馬一匹該署縣張琳復出示
曉諭以現經臣等飭派署臬司楊彤如會同雲南
臨元鎮李能臣督帶兵勇數千來縣會剿團練膽
氣益壯堵禦更嚴二十五日該匪復分夥四千餘
人至大茶高埡等村刦掠又被各村團練開礮迎
擊斃匪三名受傷無算團練亦被傷四十餘人匪
等退回烏石旋由灘面雞籠卡一帶竄去查雞籠

卡與博白縣屬之三灘冷潭昆連業經臣等飛飭
該縣游長齡嚴密堵截一面飛催署臬司楊彤如
等一俟凌十八股匪剿滅淨盡立即移師馳往前
後來擊謹會同兩廣總督臣徐廣縉合詞附片具
奏伏乞

聖鑒訓示謹

奏

會奏查覆鶴年王淑元邵坦各員身死實情片子
再臣等欽奉

諭旨有人奏賀縣知縣鶴年因兵民逃散力不能支以
致自縊龍州同知王淑元合家被害武緣縣知縣邵
坦吞金自盡除查明業經賜卹外其餘各情仍著該
大臣確切查明奏請議卹原片著鈔給閱看等因欽
此遵查賀縣知縣鶴年實因賊匪擾民未卽撲滅
兵單餉乏愁急自盡案查起獲親筆遺書內云自

二月至今已賠銀數千兩應存兵餉銀一千二百兩七月已發銀五百兩外稅厰糧局尙存銀二百餘兩城工借過銀二百兩現存銀二百餘兩錢三百餘千以便接手人敷衍數日所存衣物等件皆可變價作爲報效此信可與大眾一閱以明我志又字條一紙上書詩句十六字旣不能謀又不能戰無顏見人死亦無憾核之原奏鶴年大書於壁曰有銀二萬兩爲後來能殺賊者賞等語自係傳

聞異詞而鶴年潔已愛民一力爲公十六字聲淚俱下殊堪憫惻應懇

恩飭部議卹以昭激勸聞鶴年眷屬現寓桂林省城仍飭查明給資回旗龍州同知王淑元禦賊捐軀其第三子監生王光頴同時被害已蒙

恩准賜卹其第四子廣東遇缺儘先補用縣丞王光頴近在行營投效查訪家屬男丁六名女眷七名先移居龍州之鴨村旋移居太平府城王光頴因有

差委順道前往搬回原奏害及全家已飭明析稟
覆仍候飭給歸資以示優卹署武緣縣知縣邵坦
於道光三十年夏間因病出缺查無吞金自盡實
據容再畱心確訪謹附片具陳伏乞

聖鑒訓示謹

奏

附奏舊疾復發醫治未愈片子

再臣自上年十二月十五日馳抵柳州會辦軍務

已歷數月所有金田大股逆匪竄入武宣東鄉雖

經撫臣周天爵提臣向榮督兵攻勦而賊氛方熾

未能尅日殲除臣昕夕焦勞寢不安席舊時心疾

復發又感受山嵐瘴氣寒熱間作四肢疲軟無力

醫治未見全愈臣渥膺

重寄未敢因此稍存諉卸已於日內力疾馳赴武宣臣

諸事與撫臣周天爵提臣向榮熟商惟有殫竭血
誠於萬一謹附片具

奏伏乞

聖鑒謹

奏

硃批知道了欽此

會奏鬱林州解圍情形摺子

奏爲鬱林州會匪疊被官兵擊敗勢已窮蹙黑夜冒雨潛逃州圍已解仍飭跟踪追剿恭摺馳奏仰祈聖鑒事竊查會匪凌十八等由陸川竄赴鬱林圍攻州城經臣等飭派署臬司楊彤如會同雲南臨元鎮李能臣等督兵進剿連獲勝仗殲擒甚多業經由

驛

奏報在案茲據署臬司楊彤如等先後稟報初一日

大雨如注未能進兵初二日巳刻會督兵壯仍由西門南路排列分進至離城約二里許紮住隊伍以兵壯數十名分投引賊詎該匪施放鎗礮負固相持直至三時之久堅不出巢該署司等因恐誤蹈奸謀未敢輕率直入仍將兵勇撤回因思州城被困日久恐城內米糧缺乏關繫匪輕當復傳集兵壯練勇以連日迭獲勝仗分別等第酌給犒賞並諭以後有能認領頭隊先入賊巢者賞銀一千

兩以次遞進及拏獲首要各犯者分別酌賞各兵壯練勇鼓舞奮興紛紛認領頭二三敵又飭該州顧諸庾預備米糧數百石督飭壯勇頭目楊家傑等帶壯勇千餘名繞赴東路一俟西門剿辦得手卽攻東路賊巢堵截賊踪暗將米糧運送入城分派已定卽於初三日巳刻該鎮李能臣親督兵勇由西門列隊前進逼近賊巢復以兵壯各數十名引賊出戰該匪仍前放礮不出當以後隊兵勇防

賊抄尾餘皆隊隊逼近該匪連放大礮卽由巢內
擁出約六七百人兵壯奮勇直前賊勢慌亂兵壯
見賊膽已怯逼近賊巢正欲分投撲殺忽狂風暴
雨勢若傾盆火藥盡濕且田塍水滿立脚不住當
以前三隊紮住徐徐撤回該匪不敢來追兵壯一
無損失並據顧諧庚稟報東路賊匪經楊家傑等
帶壯直入賊卽退回東墟壯勇追至墟邊亦因風
雨大作旋即退回米糧雖未運入亦無遺失該壯

勇楊家傑等因所備米石未能運送入城卽於初四日午刻率帶壯丁馳近賊巢放礮攻擊該匪仍負隅不出旋見各壯緊緊逼入突出匪徒數百直向壯丁撲來經楊家傑等卽開礮轟擊斃匪數人匪仍拚命拒敵直至申刻礮聲未歇西門外會匪因田塍積水過深逆知官兵不進剿遂偕夥齊赴東門助戰楊家傑等猶復督勇攻擊旋見礮火愈多天已將黑且戰且退查驗各壯僅有數人身受

微傷該鎮李能臣先在大營聞有礮聲卽派滇兵
由西門夾擊該州顧諧庚亦率壯勇張亞珍等馳
往應援匪等因見兵壯勢大旋卽退入巢穴死守
不出李鎮等遂將兵壯撤回是晚大雨如注終宵
未息詎該匪卽已分股冒雨由東南兩路潛逃天
明時竄至離城十里之頭塘地方該署司聞報卽
派官兵壯練跟踪追擊殲斃後隊賊匪甚多竝奪
獲賊礮鉛子多件查頭塘地方切近陸川已飭該

縣及博白縣會營一體實力堵截等情稟報前來
臣等查該匪等自二月二十八日由陸川竄入該
州交界之分界圩肆行滋擾旋于三月初八日逼
近州城四面圍攻已及二十餘日雖城垣幸獲安
全而城外居民已被蹂躪不堪卽城內紳商士庶
隨同官兵登陴固守亦已膏竭力疲現飭確切查
明分別撫恤并飭將此次出力官弁兵壯及紳士
商民等確查具報奏請

恩施一面會督在事文武務將潰敗餘匪趕緊殲除淨盡以冀上紓

宸廑所有賊匪冒雨潛逃州圍已解緣由謹會同兩廣督臣徐廣縉合詞恭摺具

奏伏乞

皇上聖鑒訓示謹

奏 咸豐元年四月十一日具

奏奉

硃批另有旨欽此

李文恭公奏議

卷二十二

使粵

七

奏明舊疾增劇謹將

欽差大臣關防面交撫臣監護摺子

奏爲移駐武宣疾勢增劇謹將

欽差大臣關防即日面交撫臣周天爵監護以昭慎重

恭摺瀝陳仰祈

聖鑒事竊臣於本月初四日力疾馳抵武宣會商軍事
並將臣致病之由附片

奏明在案伏思臣一介書生過蒙

天恩渥膺

重寄自上年十二月馳抵柳州籌勦殲竭血誠今已敷

月賊衆猶熾金田巨匪潰出武宣東鄉復經撫

臣

周天爵提臣向榮疊次進攻未操全勝而南太潯

鬱等處羣盜蟻聚勢難迅埽臣憂心如焚誠恐大

局糜爛莫收已據實臚列入

告仰蒙

皇上軫念邊徼元元塗炭洞知粵地賊衆我寡

特簡重臣督師楚粵之交以壯聲威而破賊膽復

諄諭

臣

等齊心一力迅速藏事

臣

且感且憤不遑寢食

決計親往行營拊循將士以期一舉撲滅正在部
署舊疾復作上月二十六日晨起執筆頭目暈掉
汗出不已亟進養心理脾之劑數日稍見輕減
輒星夜馳往舟行觸冒霧露心氣旣虧兼感瘴癘
四肢痿頓不舉疾勢日甚旣抵武宣撫臣周天爵
提臣向榮皆來就商軍事且視臣疾臣以爲諸軍

既已堅守若能調和將士乘間及早破賊則臣病
自愈矣在事文武日來進謁而臣偃卧在牀精神
漸覺恟恍殊難支撐伏惟軍事重大萬不敢因疾
置身事外亦未便乞假遷延致諸軍聞而懈弛惟
所畀

欽差大臣關防係出

特旨所關甚鉅欲卧而護之則病中恐有疎虞若徑行
交出迹似推卸再四熟思惟有將關防暫交撫臣

行營遇有調撥卽由撫臣監用旣足以昭慎重於
軍事不致曠悞臣上緊醫治一有起色卽躬往按
行營壘倘竟彌留則臣雖竭力盡瘁隕首瘴鄉不
足塞責矣北望

宸極伏枕涕零不知所云伏乞

聖慈矜鑒臣謹

奏
咸豐元年四月十一日具
奏奉

硃批卽有旨欽此內閣奉

上諭前派大學士賽尙阿爲欽差大臣督帶官兵前往
湖南防堵原因李星沅奏懇專派總統期於事權歸
一本月初旬賽尙阿起程以前卽經密交諭旨令卽
馳赴廣西軍營接辦軍務並令傳知李星沅馳回湖
南會辦防堵事宜本日據李星沅奏稱移駐武宣舊
疾增劇現在上緊醫治已將欽差大臣關防暫交周
天爵等語賽尙阿現已在途著卽馳赴廣西接辦欽

差大臣事務並傳知鄒鳴鶴兼程前赴巡撫新任李
星沅著卽回籍養病毋庸畱駐軍營所有前頒給李
星沅欽差大臣關防著暫交周天爵收存俟賽尙阿
到日卽由驛遞繳還周天爵於賽尙阿未到以前通
省軍務仍著會同暫署巡撫勞崇光提督向榮悉心
籌畫相機妥辦勿稍延誤其湖南防堵事宜駱秉章
余萬清現在督辦毋得稍有疎懈欽此

遺摺

奏爲

臣

力已竭

臣

願未伸

瀝誠恭遞

遺摺仰祈

聖鑒事竊

臣

自柳馳抵武宣

病勢日增

醫藥罔效

恐有

貽誤謹於本月十一日將

欽差大臣關防暫交撫

臣

周天爵收貯

卽日專摺奏明

在案

臣

涼德菲材猥蒙

厚恩當茲重任卽捐糜頂踵豈足云報獨憾

臣

遘疾不

能滅賊又伏枕悲念

臣

母卧疴在家

臣

心如割目

不能瞑伏思臣受

先朝隆遇自翰林編修歷典蜀粵試事出知漢中府旋擢
河南糧鹽道遷陝西按察使歷江西江蘇布政使
通籍未十年卽由兩司晉陝西巡撫調江蘇巡撫
未幾升雲貴總督辦回漢事

賞戴花翎加太子太保

恩榮已極調任兩江

倚畀愈崇政務日冗

臣

以病乞歸并侍母疾道光三十年

正月

宣宗成皇帝升遐哀請叩謁

梓宮以舊臣荷蒙

召對瞻奉

天顏

皇上大孝推仁錫類俯允微臣歸養臣母及臣感入肌

髓其後以粵西賊氛未靖復自家起用爲

欽差大臣受

恩深重軍務至急臣於老母亦不遑顧矣遂兼程馳赴
廣西柳州就近調度臣思議兵必先籌餉先後奏
請

帑金百餘萬又思任將爲制賊要務粵中宿將獨向榮
可倚甫入粵境四戰皆捷其後賊由大黃江潰出
武宣滇鎮李能臣黔鎮秦定三皆能力戰署撫臣

周天爵素性樸忠匹馬督陣而賊負隅據險尙稽
天誅臣在柳州寢不安席食不甘味力疾登舟決計親

赴武宣以激勵將士掃平羣醜稍紓

聖主南顧之憂此志不遂遽隕瘠鄉奄奄一息以手自

捫臣之奉

命遠出不遑將母者爲平賊計也今督師已歷數月賊

不能平而臣病垂危永與

聖朝相辭於臣母亦已矣伏思賊不能平謂之不忠養

不能終謂之不孝臣歿之日歛臣以常服以彰臣

咎并口授臣次子概爲遺疏仰瀆

天聽犬馬哀鳴語無次序伏祈

聖慈矜鑒

臣謹

奏 咸豐元年四月十二日具

奏 咸豐元年四月二十七日內閣奉

上諭前任兩江總督李星沅由翰林敷歷外任疊蒙

皇考簡畀封圻因剿辦雲南漢回軍務

恩加太子太保銜賞戴花翎旋令總制兩江嗣以病請假
回籍上年來京召對朕見其精神強固年力方盛足

資倚畀因其母老多病俯准所請俾令歸里侍養冬
間廣西盜匪滋事特授爲欽差大臣頒給關防令其
馳赴該省剿辦厯據馳奏籌畫軍情均能周妥昨由
柳州力疾進駐武宣正擬親督將士掃除羣醜乃甫
報病勢增劇卽聞溘逝披覽遺疏詞意憂憤悼惜殊
深念其不遑將母歿于王事尤堪憫惻李星沅著加
恩照總督例賜卹任內一切處分悉予開復應得卹
典該衙門察例具奏並賞給銀五百兩經理喪事卽

著湖南巡撫於藩庫內支給頒去人參十兩交駱秉
章一併派員送致其家賞給伊母俾資調養李星沅
之次子李樞三子廩生李桓均俟服闋後交吏部帶
領引見候朕施恩欽此